

2 CORINTIOS

Yi Mimetz Necy Huidibi San Pablo Yajnigujx Je Mibijcpidijc Jim Corinto

1 Hich Pablo, Dios jadu'n ti tzocy, paady ycixpi Jesucristo ti xyajñibicyich co ngapxhuäcxibich yi' y'ayuc. Hich miid ajt nmigüg Timoteo nguejxypich jada necy ma je mibijcpidijc jim Corinto. Nañ jadu'n nguejxypich jada necy ma tüg'óciy je mibijcpidijc majaty je cajp huidibi yajpatp jim Acaya ñaaxjot. ²Huen Dios Teedy etz iich ajt nHuindzin Jesucristo may'ajt oy'ajt tunipy miid miich ajcxy etz xyajjotcugñygixip.

Nej Pablo yjajty y'ayoy

³Tzoc yajnaxim Dioscojuyip ma Dios, je nHuindzin Jesucristo yTeedy, je Dios Teedy huidibi ajt xypa'ayoohuim, je Dios huidibi yejcp jotcuje'ajtin. ⁴Dios xyajjotcugñiyim co nminajxim nyajnaxim tzaachypi ayo'n jigix jëbi nyajjotcugñiyim jacpinjaty huidibi minajxp yajnaxp tzaachypi ayo'n. Tim jadu'n nej iich ajcxy ti nbaady jotcuje'ajtin ma Dios, nañ tim jadu'n yi' ajcxy pada'n jotcuje'ajtin ma Dios huidibi minajxp yajnaxp tzaachypi ayo'n. ⁵Com tim jadu'n nej iich ajt

nminajxim nyajnaxim tzaachypi ayo'n miid Cristo ycixpi, nañ tim jadu'n miid Cristo ycixpi nbaatim jotcuje'ajtin. ⁶Paady ycixpi iich ajcxy nminajxcixy nyajnaxcixy tzaachypi ayo'n, jaydëbi miich ajcxy mbaadip jotcuje'ajtin etz nañ jadu'n ypaadip ajcxy m'alma ñidzoocin. Dios yejcpy jotcuje'ajtin ma miich ajcxy, jaydëbi miich ajcxy mbaadip jotcuje'ajtin etz nañ jadu'n ñidzögip ajcxy yi' m'alma. E co ajcxy mbaadip jotcuje'ajtin etz ajcxy m'alma ñidzoocin, chi jëbi miich ajcxy mmimadägip etz mmecxtugip tzaachypi ayo'n, tim jadu'n nej iich ajcxy nmimadägy etz mmecxtüjccixich tzaachypi ayo'n. ⁷Jotcuje nayjihuiyijich miid miich ajcxy ycixpi, com njijp'ijxpich co mmadägipy ajcxy ma mmibijcin. Com nejhuiyibich co miich ajcxy mminajxyp myajnaxyp tzaachypi, tim jadu'n nej iich ajcxy nminajxcixy nyajnaxcixy tzaachypi. E nañ jadu'n Dios yejcpy jotcuje'ajtin ma miich ajcxy, tim jadu'n nej yecy jotcuje'ajtin ma iich ajcxy.

⁸Migügtijc ajcxy, iich ajcxy ndzojcypich co miich ajcxy

rnejhuihuip jadu'n nej canaagnax tzaachypí ayo'n ti nminaxyich ti nyajnaaxyich jim Asia naaxjot. Jayin jahueeni ti ngamimadäga'ñich. Ca' anajty njijp'ixyich co nbidzimipyich juugy ma je jimbi it lugar. ⁹Jadu'n iich ajcxy nnayjihuiyí nej jäy ajcxy huidibi yajpatcixp o'cjijp'am. Jadu'n ti njatyich, jigix jëbi n'ixpicyich nej iich huaad nigi Dios nyajmij'atyich, je Dios huidibi yajjugypigip yi jäy ajcxy tiibi y'öccixy. E ca' nan ngi'm mic'ajt nmijpidaacpyich. ¹⁰⁻¹¹Ti iich ajcxy Dios xyñihua'ñ xycohua'ñ, e xyjacnihua'naamb xyjaccohua'naambich ajcxy ma yi jäy ajcxy huidibi xyaj'ögaambich ajcxy. E co miich ajcxy xypubejtyich, copicy co jacmibijctzoogix Dios miid iich ycixpi. Njijp'ixypich co Dios yi' xyjatyimy xyñihua'naambich xycohua'naambich. E pen mayjäy Dios mibijctzoogixy miid iich ycixpi, nañ jadu'n yajnájxcixyipy ajcxy jäygidaacin ma Dios miid je may'ajt oy'ajt ycixpi huidibi Dios ytumyib miid iich ajcxy.

Ti Pablo co yhuäcxijpy, ca' chojc nicxy jim Corinto

¹²Jotcujc nayjihuiyijich miid jada ycixpi com nejhuiyibich co ti ndzinäyich miid tudägy'ajtin etz miid oyjot oyhuinma'ñ miid yi mayjäy ajcxy canaag agajp etz jacnigi ma miich ajcxy. Dios miid may'ajtin oy'ajtin ti xypubetyich co tudägy ti ndzinäyich, e ca' nguyduñich ngi'mjot ngi'mhuinma'ñich ma ndzinäyich. ¹³Hich miich ajcxy nyajnijayiyb je ayuc tiy'ajt huidibi

miich ajcxy jëbi mgapxcixy etz mhuinjihuiyigixy. E nañ jadu'n njijp'ixypich co miich ajcxy mhuinjihuihuipy iich n'ayuc tüg'óciy. ¹⁴Jadu'n nej miich ajcxy cham cujc-huäcxy mhuinjihuiyigixy iich n'ayuc ndiy'ajt. Jacjiini co anajty je xii je tiempo ymiñ co ajt nHuindzin Jesús y'ane'ma'ñ ya naaxhuiñ, chi miich ajcxy jotcujc mnayjihuihuüyb miid iich ycixpi. E nañ tim jadu'n nej iich ajcxy jotcujc nayjihuihuüyb miid miich ajcxy ycixpi.

¹⁵Com nejhuiyibich co miich ajcxy xychojcpich xyjihuiyibich, paady ycixpi nhuinma'ñ nbidägyich co nicxy n'ixaangixy miich ajcxy jadüg'oc, e jadu'n nyajjotcugihuaangixich miich ajcxy mejtz'oc. ¹⁶Jadu'n nhuinma'ñ ti nbidägyich co nnicxa'ñich Macedonia. Per jayijp nnaxa'ñich ma miich ajcxy mgajp. E co anajty ndzooñich Macedonia, jadüg'oc nnicxa'ñich ma miich ajcxy. E jadu'n jëbi miich ajcxy xytüjijphuohuihuibich co anajty nnicxyich jim Judea. ¹⁷¿Nej mdijy, co iich aametz jotmetz nduñich co ca' ti nnicxyich ma miich ajcxy nej anajty ti nmina'ñich? ¿Nej mdijy, nhuinma'ñ miididyich jadu'n nej naaxhuiñyäjy huidibi minamb co ñicxa'ñ, e chi ca' ñicxni? ¹⁸Per Dios jëbi tiy'ajt yegipy co je ayuc tiibi nyajnimaaygixy, nguydunipyich yi'. Hich n'ayuc janch yi'. ¹⁹Hich miid Silvano etz Timoteo ngapxhuäxcixyich Cristo Jesús y'ayuc, je Dios y'ung. E Cristo Jesús y'ayuc janch yi', ycuydumyib je' y'ayuc, tudägy je' ycapxy.

²⁰Tüg'óciy je ayuc huidibi Dios yejc jecy'ajty miid iich ajt ycixpi, hue' Cristo Jesús cuydundaayb. Paady co ngapxpaatim n'ojadajtim Dios, chi nminaanim. "Amén, jadu'n jada," com Cristo Jesús ti cuydundäy Dios y'ayuc. ²¹Com je' je' Dios huidibi xyajmibijcim Cristo, e Dios huidibi xyajmiid'ijtim Cristo. Jadu'n Dios ytuñ miid iich ajcxy etz nañ jadu'n miid miich ajcxy. Je' je' Dios huidibi xyajmibijcim etz xypidaacim tügjijp ma y' ytung. ²²Dios ti pidägy ma ajt njot nhuinma'n je tiy'ajt co nyajpaatim ma Cristo Jesús. Co Dios xy'adigiym xyjottigiym y' yjihui'n ymic'ajt, chi tiy'ajt yecy co nyajpaatim ma Cristo Jesús.

²³Dios jëbi tiy'ajt yegipy co miid tudägy njot nhuinma'n nmiydacyich co ca' jadüg'oc nnicxyñich ma miich ajcxy mic'amy, jadu'n nej anajty nhuinma'n ti nbidägyich, miid co ca' ndzocyich nicxy n'ojcixy huin jijp. ²⁴Ca' nnicxa'ñich mic'amy ma miich ajcxy, com ca' adzip nyajmibigaangixy miich ajcxy huidibi copicy ajcxy mmibigipy. Miich ajcxy tiydudägy ti mmibijccixy. Jëyi co nbubedaangixy jaydëbi ajcxy nigi jotcujc'ajt mmiid'adipy ma ajcxy mdzinaayin mjugy'ajtin.

2 Paady ycixpi jadu'n nhuinma'n ti nbidägyich co ca' nnicxa'ñich mic'amy jadüg'oc ma miich ajcxy, miid co miich ajcxy nyajtajipy nyajmayipy co ngapxhuijyich miid ajcxy mbocy ycixpi. ²Com pen iich miich anajty ajcxy nyajtajpy nyajmaayb, çpin

jada' iich xyajjotcugihuibich? Pues miich ajcxy huidibi tajp mayb, miich ajcxy xyajjotcugihuibich. ³Paady ycixpi ti nnijayiygixy jadu'n co ca' nnicxa'ñich mic'amy ma miich ajcxy, com ca' jadu'n ndzocyich co iich miich ajcxy nyajtajipy nyajmayipy. Jac'oy co iich miich ajcxy nyajjotcugihuipy. Com nejhuiyibich co iich jotcujc nayjihuiyijich miid miich ajcxy ycixpi. Nañ jadu'n miich ajcxy jotcujc mnayjihuihuib co mnejhuihuipy co ti njotcugihuibich miid miich ajcxy ycixpi. ⁴Co ti njayich je necy huidibi ti nguexyich ma miich ajcxy, ooy mij jotmay ti njihuïyich, ixti nyaaxich. Per ca' nan paady ycixpi ti njaayich je necy co nyajtajaangixy nyajmayaangixy. Hue' janchtiy ti njaayich je necy jaydëbi mnejhuiyigixy co mijcajee ndzojccixy njihuïygixy.

Meecxin ma je pin anajty jibicpi ti tuñ

⁵Per pen jim ma miich ajcxy pinjaty ti yecy tajin mayim co ti ytundigooy, pues ca' nan iich tügpajc tajin mayim jihuiyibich. Nañ jadu'n miich ajcxy nidüg'óciy mjihuiyigixyp tajin mayin. Jadu'n nmina'ñich co huenjaty tajin mayin miich ajcxy mjihuiyigixy, jigix ca' anaxy ajcxy nyajtajip nyajmayip. ⁶Yajhuäcxijp je tzaachypi huidibi miich ajcxy mooyb je migüg huidibi ti ytundigooy. Ti miid jadu'ni. ⁷Jadu'n tzocy cham co miich ajcxy meecx je migüg jadu'n nej ti ytundigooy, etz nañ jadu'n ajcxy myajjotcugihuipy. Ca' yjecyity co je migüg anaxy oy jihuihuip

tajin mayin. ⁸Paady ycixp may'ajt nbijctzooyich ma miich ajcxy co myajniügëxigipy ajcxy co mdzocy mjihuïy ajcxy je migüg huidibi ti ytundigooy. ⁹Ich miich ajcxy ti nijayïy jayhuin miid je migüg ycixpi huidibi ti ytundigooy, jigix jëbi nnejhuïiyich, pen mguydumyb miich ajcxy ich n'ayuc, o pen ca' mguydungixy. ¹⁰Jadachambi co pinjaty ti ytundigooy ma miich ajcxy, e miich ajcxy mhuinmecxi yi' ypocy, nañ jadu'n nhuinmeecxi iich yi' nej ytundigooy. Com iich co nhuinmeecxyich tüg nmigügich nej ti ytundigooy, jadu'n nduñich miid miich ajcxy ycixpi, com Cristo y'ljxyp ñejhuïyb tüg'óciy tijaty nduunim. ¹¹Jadu'n nhuinmeecxim nmigüg ypocy, jigix Satanás, je mujcu', ca' xymimadaacim. Nejhuïiyim yaxxon nej Satanás mañ'ajt miidity.

**Pablo ca'p anajty
yjotcuje'aty jim Troas**

¹²Co nja'tyich ma je cajp huidibi xiijip Troas, chi ngapxhuäcxa'ñich anajty Cristo y'ayuc ytiy'ajt, etz mij ooy tigiycac nbatyich, nej jëbi nduñich ma ajt nHuindzin Jesucristo ytung. ¹³Per ca' anajty jotcuje nayjihuiyijich. Com ca' nminaybatich je iich ajt nmigüg Tito jim Troas. Paady ycixp ngapxycijxyich miid je mibijcpidijc ajcxy jim Troas, e nnicxyich jim Macedonia ñaaxjot.

Madaacim ma Cristo

¹⁴Nyajnajxypich jäygidaacin ma Dios co miid Jesucristo ymic'ajt jatytim y nmimadacypich

jabom jabom tüg'óciy huidibi xymidzip'ajtpich ma tüg'óciy naax cajp. Nañ jadu'n Jesucristo ti xymöyich yi' y'ayuc huidibi ngapxhuäcxypich ma tüg'óciy naax cajp. Je mayjây ma canaag cajp ooy jäygidaaccixy Cristo y'ayuc. Co ngapxhuäcxich Jesucristo y'ayuc xi ya, jadu'n nipaady nej tüg xuucin huidibi ooy oy xuugy, e y'abojïy xi ya. ¹⁵Co ngapxhuäcxich Cristo y'ayuc ma yi mayjây huidibi padamb ajcxy y'alma ñidzoocin ooy Dios jäygidägy. E ñañ jadu'n Dios ooy jäygidägy co ngapxhuäcxich Cristo y'ayuc ma yi jäy ajcxy huidibi ajcxy y'alma tigoyaamb. Jadu'n iich ajcxy ndung nipaady nej jihuïy nboomjójcixich jabom jabom ma Dios yhuinduu miid Cristo ycixpi. ¹⁶Pinjaty mijpidacp Cristo y'ayuc huidibi ngapxhuäcxypich, hue' je' y'alma nidzögamb. E pinjaty ca' mijpidägy Cristo y'ayuc, hue' je' y'alma tigoyaamb. Ooy chachchipity chachmijhuinma'ñity iich ajcxy ndung. ¹⁷Ca' iich ajcxy nduñ jadu'n nej jacnaagity ajcxy huidibi Dios y'ayuc mihuidijtip meeñgixy. Cixyjot huinijot iich jäy nyaj'ixpijccixy Dios y'ayuc ytiy'ajt. Com Dios ti xyajñibicyich co yi' y'ayuc ngapxhuäcxich. Miid co nyajpaatim ma Cristo, paady ycixp nduunim jadu'n nej jihuïy nyajpaatim jabom jabom ma Dios yhuinduu.

**Je jemybi ayuc tiy'ajt
huidibi Dios xymooyim**

3

Co jadu'n nmina'ñich ñej m'ljxcixy nej jihuïy hujjem yajtzondäga'ñich ayuc co

ndzachnaymayáanigixyich ci'm?
 ¿Nej mdzojccix co ajcxy nyaj'ixipy
 tüg tiy'ajt necy co nduñich ma
 Dios ytung? o ¿Nbijctzohuipich
 tüg tiy'ajt necy ma miich ajcxy,
 jadu'n nej nijëjity jäy ytungixy?
²Ca' iich ajcxy ndiy'ajt necy
 ycopicyity. Com jëbi yi mayjäy
 ajcxy tiy'ajt pigipy ma miich ajcxy
 mdzinaayin mjugy'ajtin co tudägy
 ti nyaj'ixpicyich miich ajcxy Dios
 ytiy'ajt. Jadu'n miich ajcxy nipaady
 nej iich ajcxy ndiy'ajt necy yaayity
 ma iich ajcxy njot nhuinma'ñ. E
 jadu'n jäy ajcxy ijxcabipy etz
 huinjihuipipy. ³Cristo ci'm
 ti pidägy yi' ytiy'ajt ma miich
 ajcxy mjot mhuinma'ñ miid je
 ayuc huidibi ti ngapxhuäcxyich
 ma miich ajcxy. Jadu'n miich
 ajcxy nipaady nej tüg tiy'ajt necy
 huidibi Cristo ti jaay. E huidibi
 iich miich ajcxy ti nyaj'ijxcixy ti
 nyajnimaaygixy. Miich ajcxy ca'
 jadu'n ocpaatni nej tüg tiy'ajt necy
 huidibi jäy ti jay miid tinta. Nañ
 jadu'n ni ca' yjëjity je tiy'ajt huidibi
 cojayip ma tüg tzaadzech. Hue'
 miich ajcxy janch nipaady nej tiy'ajt
 necy huidibi je Dios jugypí yjihui'ñ
 ymic'ajt ti jaay ma jäy ajcxy yjot
 yhuinma'ñ.

⁴Nejhuiybich tiydudägy co
 janch tiy'ajt nej nmına'ñich co
 Cristo ti xyajñibicyich jada tung
 miid Dios ycixpi. ⁵Ca'p iich ajcxy
 jëbi ci'm madägy ma Dios ytung.
 Tüg'óciy mic'ajt etz tiy'ajt jiiby
 nbáatcixyich ma Dios, huidibi
 miid jëbi ndúungixich yi' ytung.
⁶Dios ti xymóoygixyich mic'ajt co
 ndunipyich ajcxy ma yi' ytung. Dios
 ti pidägy ma iich ajt jemybi ayuc

tiy'ajt, huidibi miid xy'ane'mim.
 Jada jemybi ayuc tiy'ajt je
 Espíritu Santo pidaacp ma ajt njot
 nhuinma'ñ. E ca' je' yjadu'nity
 nej je ayuc tiy'ajt huidibi Moisés
 yjayhui'm jecy'ajty. Miid je Moisés
 y'ayuc huidibi jaybety ijtp, Dios
 xymooyim je o'cin. Miid je jemybi
 ayuc tiy'ajt huidibi je Espíritu Santo
 yejcpy, Dios xymooyim jugy'ajtin
 huidibi ca' ycixipy ytigoyipy ni
 mina.

⁷⁻⁸Je Dios ycötujcin huidibi
 Moisés yjayhui'm hue' jaybejty
 oga'n ma tüg tzaa. E je huin'it
 tiempo ooy Moisés anajty
 yhuin'yijp mic y'adicxy miid Dios
 y'oy'ajtin. E je Israel jäy ajcxy
 ni ca'p je' anajty huaad y'ijxcixy
 Moisés yhuin'yijp, co anajty ooy
 mic chach'adiicxy. E jada Dios
 y'oy'ajtin huidibi Moisés ymiid, ca'
 jecy y'ijty. Hue' je' tigooyñip anajty
 oñydägy'amy. Per pen Dios yaj'ijxip
 anajty yi' y'oy'ajtin co Moisés
 moy je jäy ajcxy je Dios ycötujcin
 huidibi ane'm yi o'cin, nigi mi'idipy
 Dios y'oy'ajtin je jemybi ayuc tiy'ajt
 huidibi je Espíritu Santo xymooyim.
⁹Pen mij anajty oy'ajtin miidity je
 cötujcin huidibi tuuñ co y'ane'my
 ma iich ajt nbocy n'o'cin. Nigi
 mij'oy'ajtin miidity Dios y'ayuc
 ytiy'ajt je jemybi huidibi minaamb
 co Dios jëbi xyaj'ahuimbijtim
 tudägy. ¹⁰Jëbi nminaanim co je
 jécyp cötujcin y'oy'ajtin ca' yi'
 ytimytiijty co nyajquixyihuaanim
 miid je jac'oybi oy'ajtin huidibi
 Dios y'ayuc ytiy'ajt jemybi ymiid.
¹¹Com pen ymiid oy'ajtin je
 cötujcin huidibi ymic'ajt ca' y'ida'ñ
 huinixi huinit tiempo, nigi oy'ajtin

miidity Dios y'ayuc ytiy'ajt jemybi huidibi ca' ycixipy ytigoyipy nimina.

¹²Miid co njijp'ijxim je oy'ajtin huidibi Dios xymöhuaanim miid je jemybi y'ayuc, paady ycixp ngapxhuäcxim Dios y'ayuc huinmic jotmic. ¹³Ca' jadu'n nduunim nej Moisés idiich jecy'ajty co anajty miidity yhuiñyijp huingobe'nëy, jigix ca'ydi Israel jäy ajcxy icy nej je' anajty ytigoy je Dios y'oy'ajtin huidibi anajty quëxëp ma je' yhuiñyijpin. ¹⁴Per yi Israel jäy jecy'ajty ca' ajcxy yajxon huinjihuiiy ti anajty Dios ytumyb miid Moisés, ixti chambaadni yi Israel jäy ajcxy ca' yajxon huinjihuiyigixy co ajcxy capxcixy je ayuc huidibi Moisés yjayhui'm. Jadu'n nipaady nejjihuiy Moisés chambaadni y'ityñi huingobe'nëy. Co ajcxy mibigipy je Cristo, huin'it ajcxy huinjihuihuipy, e jadu'n je' paadipy nej jihuüy Moisés ti ñayhuingobe'ndüdyii. Co yi Israel jäy ajcxy mibijccixipy Cristo, e ijxip ajcxy Dios y'oy'ajtin, huin'itni ajcxy huinjihuihuipy Dios y'ayuc ytiy'ajt je jécyip.

¹⁵Ixti chambaadni co yi Israel jäy ajcxy capxcixy je migooxpi libro huidibi Moisés yjayhui'm, ca' ajcxy huinjihuiiyi yajxon Dios y'ayuc, jadu'n nipaady nej ajcxy yhuinma'n ymädiy. ¹⁶Pinjaty jothuimbijtp, e mibicy iich ajt nHuindzin Jesucristo, oyiiñip yi' yhuinma'n, e yhuinjihuihuipy Dios ytiy'ajt. ¹⁷Je Huindzin Jesucristo, yi' je' Dios yjihui'n ymic'ajt ymiid. E ma Dios yjihui'n ymic'ajt yajpaady, Dios yi' yi jadu'mbi jäy ajcxy yajnihuätzictutp ma yi Dios

ycötujcin je jécyip. ¹⁸Paady ycixp tüg'óciy iich ajt jadu'n nipaady nej tüg ijx ma nni'ijxim ajt nHuindzin Jesucristo y'oy'ajtin. Com ca' jadu'n patni nej jihuüy n'ijtim huingobe'nëy. E nañ jadu'n iich ajt njacyujcpejtım n'oy'ajtin, jaydëbi nguipxyjatytiyım miid Cristo. Com jabom jabom iich ajt nği nbaatım n'oy'ajtin ma Cristo. Jada je' huidibi je Dios yjihui'n ymic'ajt ytumyb ma ajt njot nhuinma'n. E iich ajt nHuindzin Jesucristo ti pidägy Dios yjihui'n ymic'ajt ma ajt njot nhuinma'n.

4 Com Dios ti xypa'ayooyich, e ti xyajñibicyich co ngapxhuäcxibich yi' y'ayuc ytiy'ajt jemybi, paady ycixp ca' njotmetzcıyich. ²Per ooy ti njijpcodijıyigixyich ti njijpcogapxıyigixyich yi jäy ajcxy y'ayuc huidibi ajcxy ytungixyp etz ycapxcixpy ayüch ameech, etz huidibi oymidzöyduuni. Ca' iich ajcxy ti nduñich miid jibic-huinma'n. Nañ jadu'n ni ca' nyajtigájtzcıxıch Dios y'ayuc. Hue' janchtiy ngapxpıch ajcxy huidibi janchip. Jadu'n nyaj'ıxpıjccıxıch yi jäy ajcxy, jaydëbi ajcxy jotcujc ñayjihuiyigixy ma Dios yhuinduu. ³Yi jäy ajcxy huidibi nicxy y'alma ytigoyaangixy ca'oydactuuby, ca' ajcxy huinjihuiy Dios y'ayuc oybi nej jëbi ajcxy y'alma nıdzögıpy. Jada je' je ayuc huidibi ngapxhuäcxıcpıch. Pinjaty ajcxy y'alma nıdzögıpy yhuinjihuiyib ajcxy jada ayuc. ⁴Yi' ajcxy huidibi y'alma tigoyaanıpy ca' mibijccıxı Dios y'ayuc, com Satanás huidibi ane'mb ya naaxhuiñ ti yajmädyii

ajcxy yhuinma'ñ. Ca' je' ajcxy huinjihuüy Cristo y'ayuc oybi. Cristo tú'ciy yaj'ixy, tú'ciy mic'ajt miidity, nej Dios yaj'ixy nej Dios mic'ajt miidity. E Cristo y'ayuc jadu'n nipaady nej tüg mijtixin huidibi Satanás ti ahuijztucy ca'ydi yticxy ma je' ajcxy. ⁵Co iich ajcxy ayuc ngapxhuäcxyich, ca' iich ajcxy ngapxhuäcxy ngi'm'ayuc ngi'mdiy'ajt. Hue' iich ajcxy ngapxhuäcxyp Jesucristo y'ayuc ytiy'ajt. Ngapxhuäcxyich ajcxy co Jesucristo ñihuindzin'ajttaayb tüg'óciy. E nañ jadu'n ngapxhuäcxyich ajcxy je tiy'ajt co iich ajcxy jadu'n naydijiygixyich nej jihuüy miich ajcxy xytumbi'adyi miid Cristo ycixpi. ⁶Je Dios huidibi jecy'ajty ane'm co huen tiicxin ji'aty huidibi codiicxip ma ycoodzity, yi' ti xymooyim y'ayuc ytiy'ajt. Yi' y'ayuc tim jadu'n nipaady nej tüg tiicxin nmiid'ajtim ma ajt njot nhuinma'ñ, jigix jëbi n'ijxim je Dios y'oy'ajtin huidibi quëxícip ma Jesucristo yhuiniyijp.

Je jugy'ajtin co nmibijcim

⁷Je Dios y'oy'ajtin oybi nmiid'ajtim ma ajt njot nhuinma'ñ, iich ajt ca' ni ti mic'ajt nmiid'ajtim ma ajt ngi'mjot ngi'mhuinma'ñ. Jadu'n Dios pidägyñi yi' y'oy'ajtin ma iich ajt, tim jadu'n nej jäy ajcxy pidaaccixy pi'cmeen ma pi'c'idzimboch. ⁸Oy iich ajcxy nminaxyich nyajnaaxyich may ayo'n, per ca' ndajy nmayich ajcxy anaxy. Ooy nhuinmay'ahuidjtcixyich miid je tzaachypi ayo'n ycixpi, per ca' nhuinma'ñyidigóoygixyich. ⁹Oy iich ooy nmidzip xy'ixhuidityich

xypahuidityich, per Dios ca' xy'ixmachich. Canaag'oc iich nmidzip ti xycujy ti xyjibipyich. Per ca' iich njugy'ajtin ti ytigooy. ¹⁰Hueñyma'amyity nhuidityich ajcxy nmiidich je tzaachi'au ma nninícxich, ma jäy ajcxy ti xychaachytúungixich. Je' je' je iixpejt co nhuidityich o'cin jijp'am, tim jadu'n nej Jesús anajty huidity o'cin jijp'am. Ngöbajcypich jada tzaachypi, jigix tüg'óciy jäy ajcxy nejhuihuip co Jesús xypubejtpich xypudigiibych. ¹¹Nami jacjugy'ajtnich ajcxy, o'cjijp'am iich ajcxy nhuidijtcixy jabom jabom miid Jesús ycixpi, jigix jëbi tüg'óciy jäy ajcxy nejhuihuipy co Jesús xypubejtcixyp xypudigiigyixyp. ¹²Jadu'n ndzinäyich o'cjijp'am, jigix miich ajcxy miid'adip jugy'ajtin huidibi ca' ycixipy ytigoyipy. ¹³Jaybety ymiñ ma Dios ñecy ma jadu'n ymina'ñ: "Ti nmibicyich, e paady ycixpi ti ngapxpídzimybich nej ti nmibicyich." Tim jadu'n nej Dios ñecy ymina'ñ, nañ tim jadu'n iich ajcxy yminaangixy co nmibíjccixyich Dios, e paady ngapxpídzimgixyich nej nmibíjccixyich. ¹⁴Com nejhuüyim jadu'n nej Dios yajjugypijcy Jesús co y'o'cy. Nañ tim jadu'n Jesús xyajjugypigaanim jadüg'oc miid Dios ymic'ajt co anajty n'o'cim. E quipxyi miid miich ajcxy xyajnícximip ma Dios yhuinduu. ¹⁵Tüg'óciy tzaachypi huidibi nminajxypich nyajnajxypich, hue' nminaxyich nyajnaaxyich miid miich ajcxy m'oy'ajtin ycixpi. E co anajty Dios jactuñ may'ajtin miid jacjadyi mayjäy ajcxy, nañ jadu'n

mayjäy yajnájxcixipy jäygidaacin ma Dios, jigix jëbi mayjäy iibáatcixipy capxpáatcixipy Dios.

¹⁶Paady ycixpi ni mina xii, iich ajcxy ngajotmetzcíhuaangixy.

Oy iich ajcxy nninícx yjaccöminajc'idích jabom jabom, per iich ajcxy njot nhuinma'nñ nīgi mic'ajt paady jabom jabom.

¹⁷Je tzaachypi je ayo'n huidibi nminajxim nyajnajxim ya naaxhuiñ, ca' yi' ytimytiijity. Cixip naxip yi'. E miid co nminajxim nyajnajxim tzaachypi ayo'n, huin'lit nbaatim oy'ajtin nīgi ymijity y'oyity huidibi ca' ycixipy ñaxipy ni mina.

¹⁸Ca' huaad iich ajt nhuinma'nñ nbidaacim ma huidijaty cixamb tigoyamb. Tüg'óciy tijaty yaj'ijxp yajhuindiicxp ya naaxhuiñ, cixíp tigoyíp yi'. Per huidijaty ca' yaj'ixy yajhuindicxy, idíp yi', ca' ycixípy ytigoyípy nimina.

5 Com nnejhuiiyim co n'o'cim, naaxnícx ajt huidibi nmiid'ajtim ya naaxhuiñ cixamb tigoyamb yi'. Dios ymiid ni'ixi' jiiiby tzajpjoty huingbi ninícx huidibi yi' ti cojy huidibi xymöhuaanim. Je ninícx huidibi xymöhuaanim jadu'n nipaady ma ajt n'alma nej tüg tije huidibi tinaayb huinixii huinitiempo. Tüg tije huidibi Dios ti cojy, ca' nan huidibi jäy ajcxy ti cojixy. ²Janch tiy'ajt co ca' ooy jotcujc ndzinaayim ya naaxhuiñ miid ajt nninícx. Ooy njijp'ijxim mina nbadaanim ajt je nninícx huidibi nmiid'adaanim jiiiby tzajpjoty. ³Je' nninícx xyüdzim tim jadu'n nej co tüg jemyhuit nyajtigiyyim, ca'ydi n'ijtim niñuädz.

⁴Nami njactzinaayim ya naaxhuiñ

miid ajt nninícx, ca' ooy jotcujc nayjihuiiyim. Ooy xyajtajim xyajmayim je tzaachypi ayo'n huidibi nminajxim nyajnajxim. Ca' nan co ca' ndzojcm ajt nninícx, o co nyajtigoyaanim ajt nninícx. Hue' ndzojcm co nmiid'ajtim jemybi jugy'ajtin jemybi ninícx jigix co ajt njugy'ajtin huidibi cixamb tigoyamb, ahuimbidip yi' jemybi jugy'ajtin huidibi ca' ycixípy ytigoyípy. ⁵Dios yi' ti yaj'oyiyy je jugy'ajtin huidibi nmiid'ajtim cham, jigix jëbi nmiid'ajtim huingbi jugy'ajtin huidibi ca' ycixípy ytigoyípy ni mina. Dios ti xymoyim je Espíritu Santo je' je' tiy'ajt ma iich ajtin co nbadaanim jemybi jugy'ajt jembyi ninícx.

⁶Jabom jabom iich ajt jotcujc naybidaacim. Nejhuiiyim co nami n'jactzinaayim miid ajt nninícx, ca' nmiid'ajtim jemybi ninícx, ca' nyajpaatim ma ajt nHuindzin Jesús chinäy. ⁷Je' nninícx xyüdzim tim jadu'n nej co tug jemyhuit nyajtigiyyim, ca'ydi n'ijtim niñuädz. ⁸Jotcujc etz jotmic nayjihuiiyim. Nigi jotcujc ixipy nayjihuiiyim, e ooy njatzojcm co mic'amy ixipy n'ijxmajtzim jada ninícx, jigix nícxy ndzinaydacpijcm ma ajt nHuindzin Jesús chinäy. ⁹Paady ycixp jadu'n njacjugy'ajtim njactzinaayim jigix jëbi ajt nHuindzin Jesús jäygidägipy ajt ndzinaayin. Ca' ñejity pen njactzinaayim ixipy miid ajt nninícx, o pen tzojc n'ijxmajtzim ajt nninícx ixipy, e nícxim ma Jesús yajpaady. ¹⁰Nidüg'óciy iich ajt nayguëxigaanim ma Cristo ytiydundac, e jiiiby nidüg nidüg paadip huidi anajty nipidziimip

jadu'n nej anajty ti chinäy, pen oy,
o ca' y'oyity.

**Je ayuc tiy'ajt huidibi
nicy'ajt cidägy'ajt miid**

¹¹Com nejhuiyim co copicy
nhuindzigiiyim ajt nHuindzin
Jesucristo, paady ycixpi mictägy
nyajmibicyich yi mayjäy ajcxy
Cristo ytiy'ajt. Dios ñejhuiyb co
tudägy iich njot nhuinma'ñich. E
ñañ jadu'n ndzocyich co miich
ajcxy mnejhuüiyigixipy co tudägy
iich njot nhuinma'ñich. ¹²Ca'p
iich ajcxy yam naygapxpáatigixy
jadüg'oc co iich ajcxy ooy
n'oyjäyity, o co iich ajcxy ooy
oy ndúngixyich. Hue' janchtiy
lugar nyejcpyich, jaydëbi miich
ajcxy xycapxpadipyich etz jotcuje
mnayjihuiyigixipy miid iich
ajcxy ycixpi. Jigix jëbi miich ajcxy
m'adzohuip yi jäy ajcxy huidibi
capxpatp pinjaty yhuinñijp ooy oy
yquëxigy, e ca' ajcxy tuñ cuendi
pen je' miid oyjot oyhuinma'ñ,
o pen ca'. ¹³Pen minamb jäy
ajcxy co iich nlocity, huen
xyajnájxcixyich loci miid Dios
ycixpi. Pen jäy minaangixp co oy
huinma'ñ nmiididyich, jëbi jadu'n
ajcxy xyajnájxcixyich jadu'n nej
oy huinma'ñ nmiididyich miid
miich ajcxy m'oy'ajtin ycixpi.
¹⁴Com Cristo ooy xychojcm
xyjihuiyim, paady ycixp
njatytimycapxymidoohuim Cristo.
Com nnejhuiyim ajt nidüg'óciy
tiydudägy co Cristo y'o'cy miid ajt
nbocy ycixpi, e paady ycixpi jadu'n
nipaady nej jihuüy nidüg'óciy iich
ajt ti n'o'cim quipxyi miid Cristo.
¹⁵Cristo o'c miid tüg'óciy jäy ajcxy

ycixpi, jigix co tüg'óciy jäy ajcxy
huidibi jactzinaayb jacjugy'ajtp,
ca' ajcxy yajtúngixipy yci'mjot
yci'mhuinma'ñ ma ajcxy chinaayin.
Huen ajcxy tzinaaygixy miid
Cristo ycixpi huidibi o'c miid yi'
ajcxy ypocy ycixpi, etz yjugypijcy
jadüg'oc miid yi' ajcxy ycixpi.
¹⁶Miid co ndzinaayim miid Cristo
ycixpi, paady ycixp ca' ndunim
cuendi naaxhuiñjyay ajcxy nej
ñayñigápxigixy nayñimiydáacigixy.
Jayijp ca'ni anajty nmibijcm, ooy
anajty ndunim cuendi nej jäy ajcxy
ñayñigápxigixy nayñimiydáacigixy.
Jadachambi etz yjacnicxn xii
tiempo, ca' ndunim cuendi nej
naaxhuiñjyay ajcxy capxcixy
miydaaccixy. ¹⁷Com tigachjaty
cham nhuinjihuüyich Cristo,
paady ycixp pinjaty yajpatp ma
Cristo, jemyjot jemyhuinma'ñ je'
ymiid'ajtnip, jadu'n nipaady nej
jihuüy ti ma'xung'aty huinjemy.
Je jot je huinma'ñ huidibi anajty
ymiid co anajty ca'ni mibicy Cristo,
ti je' ñajxtäy, jadachambi ac jemyjot
ac jemyhuinma'ñ ti y'ahuimbijttäy.
¹⁸Tüg'óciy tijaty huidibi ya
yajpatp, jilby choon ma Dios,
Dios yaj'oyiyday. Miid huidijaty
Cristo ytuun miid iich ajt ycixpi,
jotcuje n'ijtim miid Dios. E Dios
xyajnibijcch co ngapxhuäcxich
Dios y'ayuc jadu'n nej jäy ajcxy
jëbi ajcxy jotcuje y'ijtcixy miid
Dios. ¹⁹Jadu'n nminaanim co
Dios ymiid'ijtpy Cristo. E Dios
tuun quipxyi miid Cristo co yi'
yaj'oyiyy je tzip nej naaxhuiñjyay
ajcxy midzip'aty Dios. Dios ca'
yajcomidohua'ñ jäy ajcxy ypocy
huidibi mibijccixp Cristo, miid co

Cristo ti yajpocynñihuächyii. E Dios ti xyajñibicyich co ngapxhuächyich yi' y'ayuc nej jäy ajcxy jëbi paadip pocyhuinmeecxin, etz nañ jadu'n paadip jotcujc'ajtin ma Dios.

²⁰Paady nhuidityich miid Cristo ycixpi ngapxhuächyich Cristo y'ayuc. Jadu'n huimbidzimyb nej jihuüy miich ajcxy Dios xyminucxtaaccixy miid iich n'ayuc jigix mmibíjccixipy Cristo y'ayuc. Paady ngodinäyich Cristo co nminucxtacypich miich ajcxy. Jothuimbijtcix nej mdundigooygixy miid Dios ycötujcin e Dios xyhuinmeecxip ajcxy mbocy, jigix jotcujc m'idipy ajcxy ma Dios.

²¹Cristo ca' ma ytundigooy, per miid ajt nbocy ycixpi Dios yajnajx je Cristo jadu'n nej tüg pocyjäy. Jadu'n Dios ytuñ miid je Cristo, jigix co iich ajt n'ijtim ma Cristo, nbaatim je tudägy'ajtin huidibi Dios chojcpy nmiid'ajtim.

6 iich ajcxy etz miich ajcxy quipxyi nduunim ma Dios ytung. Nminucxtacpyich miich ajcxy co mgöbigipy ajcxy je may'ajt je oy'ajt huidibi Dios ti tuñ miid miich ajcxy ycixpi, ca'ydi ñaadigí'aty Dios ytung. ²Com jadu'n jaybety y'ity ma Dios ñecy ma Dios jadu'n ymina'n:

Co je xii tiempo ti patni, ti iich miich m'ayuc midoohui. Ti nbubety nbudigíyich je huin'it xii je huin'it tiempo co ti yhuaad'aty mina jäy ajcxy y'alma ñindzögipy. Jadachambi xii tiempo ti yhuaad'ajtni mina jëbi Dios xyñidzoocim ajt n'alma.

³Ca' pin n'adzipyich co nduñich ma Dios ytung, jigix ca'ydi pinjaty

ymina'n co ca' oy nduunich. ⁴Nañ jadu'n ca' n'adziba'nich miich ajcxy. Nigi ndzocyich co ñiguëxigip tüg'ociy iich ndung co nduunich miid Dios ycixpi. Ooy nyajtuñich mecxtujcin. Ooy nmecxtucyich ayo'n etz tzaachypi. Ooy nyajmayjatyich nhuit nducxy ngaayin n'uucín. Ooy iich ndzinaayin chipity.

⁵Ti ajcxy xycí'atyich, ti ajcxy xypidáacixyich pujxtigoty. Ti jäy ajcxy xymibidigiyich, e ooy ajcxy yhuaangixy yjihuiygixy. Ti tzaachypi nminaxy nyajnaxyich ma ndungich. Minaajity canaag xii ca' nmäyich, e minajity ayuu n'ityich.

⁶Nyajniguëxícpy iich ajcxy co iich ndúngxyich miid Dios ycixpi, miid co huädz jot huinma'n nmiididyich ajcxy. Ca' ma jibicpi nmiididyich ajcxy, miid co n'ixpíjccixyich ma Dios ytiy'ajt. Ooy mecxtujcin nmiididyich ajcxy. Ooy iich ajcxy nba'ayooyich nmigügtjicich. Dios yjihui'n ymic'ajt yajpatp ma iich ajcxy njot nhuinma'n. Ooy iich miich ajcxy ndzojccixy njihuüygixy cixyot huinijot. ⁷Nyajniguëxígy iich ajcxy co ndúngxyich miid Dios ycixpi, miid co ngapxhuäxcixyich Cristo y'ayuc ytiy'ajt tudägyi, e nañ miid co nmiididyich ajcxy Dios yjihui'n ymic'ajt, etz miid co nmiididyich ajcxy ca'pxy Dios ytiy'ajt tudägyi. Miid yi' ytiy'ajt tudägyp nyajmibicyich jäy ajcxy, etz miid yi' ytiy'ajt naygohua'ñiyijich ma nmizipich. ⁸Minaajity jay xycapxpáadygixyich; minajity jäy ajcxy xyñigapxy xyñi'oñiyigixyich; minajity jäy yminaangixy co oy nduunich; minajity jäy yminaangixy co jibic nduunich;

mina ngamina jäy xytjicixyich co n'indáaccixyich; e minaaity jäy yminaangixy co tiy'ajt ngapxich. ⁹Minaaity jäy yminaangixy co ajcxy ca' xy'ixy'ájtigixyich; e minaaity jäy yminaangixy co ooy oy xy'ixy'ájtigixyich; e minaaity ayo'n jipp'am o'cin jipp'am nhuidjtcixyich. Per jactzinaaybich ajcxy jadu'n. Ti je tungmiidpi xychaachtúngixyich, per ca' iich ajcxy xyaj'o'cyi. ¹⁰Ooy iich ajcxy njatacixy njamaangixy, per jabom jabom jotcujc nayjihufiygixyich. Ayoobi iich ajcxy ca' ti meen etz ca' ti pidägy nmiid'ájtigixyich. Per nañ jadu'n mayjäy oy'ajtin padañ ma Dios miid iich ajcxy ndung ycixpi, jadu'n jada oy'ajtin nipaady nej meen etz nej pidägy. Oy ca' meen etz ca' pidägy nmiididyich ajcxy, per nmiidich ajcxy tüg'óciy huidibi nimina ca' ycixy ytigooy.

¹¹Migügtijc ajcxy, huidibi yajpatp jim Corinto, ti nmiidcapxcixy ti nmiidmiydaaccixy ma jada necy miid tüg'óciy tudägy'ajt. Ti ngapxyich nmiydägyich nej njot nhuinma'n nmiididyich. ¹²Ca' iich n'ixmach nej iich miich ajcxy ndzojccixy njihuiyigixy cixyjot huinijot. ¹³May'ajt nbijctzooybich ma miich ajcxy co xyajnimähuibich nej miich ajcxy mjot mhuinma'n miidity tim jadu'n nej ti nduunich miid miich ajcxy. Jadu'n may'ajt nbijctzooyich ma miich ajcxy nej ungdeedytjic ajcxy oy'amy y'ung ajcxy iihuicixy capxhuicixy.

Ich ajt je' ma Dios jugypi chinaayin

¹⁴Miich ajcxy, ca' mdungmujccixy m'ayoomujccixy miid jäy ajcxy

huidibi ca' mibijccixy Cristo. Com ca' huaad tudägyjäy ajcxy miiddzinaaygixy jäy ajcxy huidibi ca' tudägy huinma'n miidity. ¿Nej jëbi je huidibi tiy'ajtp ytügüy miid huidibi ca' ytiy'ajtity? ¿Nej jëbi pinjaty tiy'ajt miid miid'idipy pinjaty huidibi ca' tiy'ajt miidity? Je huidibi tiy'ajt miid jadu'n nipaady nej chinäy ma jijn ytiicxin. E je huidibi ca' tiy'ajt miidity ñipatp nej jihuüy chinäy agootztuuby. ¹⁵¿Nej jëbi Cristo etz Satanás ñay'ayuc-huinjihufiyigixy? ¿Nej jëbi tüg mibijcpi yajtügüy yhuinma'n miid tüg huidibi ca' ymibicy? ¹⁶Ca' ni nej jëbi tzaadzech quipychech y'idipy ma Dios ytijc. Com yi' ajcxy huidibi tzaadzech ojadajtp ca' ajcxy yhuinma'n ytügüy miid Dios ytiy'ajt. Je Dios juugypi ymiid chinaydac ma iich ajt njot nhuinma'n, paady ycixp jadu'n iich ajt nipaady nej Dios ytijc. Com jaybety y'ity ma Dios jadu'n ymina'n:

Ndzinaydac nbidägaamybich ma yi' ajcxy. Huididaamybich ma yi' ajcxy yajpaady. Yi' ajcxy iich xyDios'adaanip. E iich ajcxy yi' njäy'adaanip.

¹⁷Paady nañ jadu'n ajt nHuindzin Dios yminañ:

Copicy co miich ajcxy m'ixmadzipy yi' jacjadyii jäy ajcxy, e tzinaaygix abicy. Ca' ajcxy mnijot'adipy je jibicpi, huin'tit iich miich ajcxy ngöbigipyich.

¹⁸Ich miich ajcxy xymiid'adipyich jadu'n nej jihuüy iich miich ajcxy xyTeedy'adyii. E jadu'n miich

ajcxy m'idipy nej iich nmang n'anäg.

Jadu'n je mijpi Dios ymina'n.

7 Miich ajcxy huidibi ooy ndzocy njihuüyich, com Dios jadu'n ymina'n co tzinaydac pidäga'n ma ajt njot nhuinma'n, paady ycixp tzoc yajhuaatzim ajt njot nhuinma'n, etz ma ajt n'espíritu, e jadu'n Dios nhuindzigiïym etz nyajmij'ajtim cixyjt huinijot.

Co ajcxy jothuimbijt ma Dios huidibi ajcxy jim Corinto

²Tungix may'ajt xycöbigipich miich ajcxy cixyjt huinijot.

Ca' iich ajcxy ni pin ti nmidundigóoygixyich, nañ jadu'n ca' ni pin iich ajcxy ti nyaj'ixpjccixyich jibic-huinma'n. Nañ jadu'n ni ca' iich ajcxy pin ti nhuin'iïnich.

³Ca' jadu'n nmina'n iich miid co nyajpocycähua'n iich miich ajcxy. Com jadu'n jacjayijp ti mina'n iich co ooy ndzocy njihuüyich miich ajcxy, tú'ciy ajcxy ndzinaayim, e tú'ciy ajcxy n'ó'cimipy. ⁴Ooy iich miich ajcxy njot'amij'adyiijich. Ooy iich miich ajcxy ngömaaygixy. Ooy jotcujc nayjihuiüyijich miid miich ajcxy ycixpi. Oy njayajpaadyich tzip agujc ayo'n agujc, per co njäymeich miich ajcxy, jotcujc nayjihuiüyijich.

⁵Nej iich ajcxy nja'ty ya Macedonia, ca' njotcujc'ajtcixyich. Hue' nyajpaadyich ajcxy tzip agujc capxy agujc huen ma'amyity. Jäy ajcxy xymidzip'ajtpich, etz nañ jadu'n tzigiïybich jotjoty huinma'ñyoty. ⁶Per Dios je huidibi

yajjotcugiiyb yajjotmicpijcp pinjaty tajp mayb, yi' ti xyajjotcugüyich co Tito yja'ty ya ma iich nyajpaady co jim choñ ma miich ajcxy. ⁷Ca' nan ti njotcugüyich miid tim jëyi co Tito ti xyñijädyich. Hue' ti njotcugüyich co yi' ti xyñimäyich jadu'n nej yi' jotcujc'ajtin ti paady ma miich ajcxy. Yi' ti xyajmiidmiydägyich jadu'n nej miich ajcxy tajin mayin mjihuiüygixy miid mbocy ycixpi. E nañ jadu'n nej mhuiinmaaygixy nej nyajpaadyich. E miid jada ayuc nigi ti njotcugüyich.

⁸Iich ca' ndajy nmayich miid co iich miich ajcxy ti nyajtajcixy ti nyajmaygixy miid je necy huidibi ajcxy nyajnigüeijx. Oy anajty ti njajihuüyich jotmay co nnejhuüyich co miich ajcxy ooy mdajy may tüg xii mejtz xii miid iich nnecy ycixpi. ⁹Jadachambi ooy jotcujc nayjihuiüyijich. Ca' nminaanim miid je tajin je mayin ycixpi huidibi miich ajcxy anajty miid jotcujc'ajtpich, com co je tajin je mayin ajcxy ti xyajjothuimbijtcixy, Dios ti jäygidägy jadu'n nej miich ajcxy ti mmimadaaccixy je tajin mayin. E ca' iich ti ndundigooyich ma miich ajcxy co ajcxy njotmaymoy. ¹⁰Com Dios yjäygidacpyi co jäy njothuimbijtcixy, miid co taj may ñayjihuiüyigixy miid ypocy ycixpi. E co ajcxy yjothuimbijtcixy, huin'it ajcxy je y'alma nïdzoocin paadipy. E ca' je' huaad nidajim nimaayim co ajcxy y'alma nïdzögy. Co jäy ajcxy nidajcixy nimaaygixy huidi yajpat ya naaxhuiñ, e ca' yjothuimbijtcixy, jadu'ni nicxy je o'cin nipatcixy. ¹¹Miid je tügpi

jäy ypocy ycixpi ti mbaatcixy je tajin mayin. Miich ajcxy jadu'n ti mmecxtujccixy je tajin mayin jadu'n nej Dios jäygidägy. Tungix cuendi jada' cham nej ti yhuimbizimy. Tiydudägy janch cham ti mdiydungixy miid je pocy ycixpi. Ti xyajjotma'tcixy, e ti xy'adzigiigixy, e ni'ixiy miich anajty m'ijtcixy co mdzaachytunaangixy je huidi ti ytundigooy. E miid jada ycixpi ti miich ajcxy myajniguëxiccixy, co ca' miich ajcxy ti pocy mmiidity ma jadayaabi huinma'n. ¹²Co iich miich ajcxy jayhuin nijayiy, ca' nminaanim miid je' ycixpi huidibi anajty ti ytundigooy. Nañ ca' nminaanim miid je huidibi anajty ti yajmidundigooy. Nijayiyich miich ajcxy, jigix jëbi mnejhuiigixy je tiy'ajt nej Dios tzocy co nduunich miid miich ajcxy m'oy'ajtin ycixpi. ¹³Com miich ajcxy ti mmijottigooyb Dios ytiy'ajt, paady ycixpi miich ajcxy ti mbaatcixy jotcujc'ajt, e nañ jadu'n iich ajcxy ti nbáatcixyich jotcujc'ajt miid miich ajcxy ycixpi. Nañ jadu'n ooy ti njotcugiyich ajcxy miid co Tito ooy chachjotcujcity. Oy'amy miich ajcxy ti mgöbijccixy Tito, paady yi' ooy ti yjotcugiy miid miich ajcxy ycixpi.

¹⁴Co ti nnimäyich Tito co njot'amij'adyijich miich ajcxy, ca' ti tzo'ydu'n ti nbaadyich, co yi' oy ti xyco'ixiigixy. Nigi oy ti yhuimbizimy miid co tüg'óciy ayuc huidibi iich miich ajcxy ti nyajnimäy ti yhuimbizimy co yjanchity. Nañ jadu'n ti yhuimbizimy co yjanchity jadu'n nej ti nnimiydacyich miich ajcxy

miid Tito co njot'amij'adyijich miich ajcxy. ¹⁵Jadu'n nej co Tito oy miich ajcxy xycogapxiy, yi' ooy nigi xychojccixy xyjihuiigixy co yi' nejhuiy jadu'n nej miich ajcxy mmijottigooygixy iich n'ayuc, jadu'n nej mgapxymidoohuaangixy. E nañ jadu'n co yi' ijxy nej miich ajcxy yi' mgöbijcy miid tzig'iñ jihui'n. ¹⁶Ooy jotcujc nayjihuiyijich, ooy njot'amij'adyijich miich ajcxy.

Ycüejtixy miid oyjot oyhuinma'n

8 Jadügnax, miich ajcxy migügtijc, nyajnejhuihuaamybich nyajmiidmiydägaamybich miich ajcxy, jadu'n nej Dios may'ajt oy'ajt tuñ miid je mibijcpidijc ajcxy huidibi xii ya yajpatp Macedonia. ²Je mibijcpidijc huidibi ya yajpatp ti ooy ajcxy minaxy yajnaxy tzaachypi etz ayo'n. Per ca' ñejity, ooy ajcxy jotcujc yajpatcixy. Nañ ayoobi ajcxy, per ti ajcxy may meen yajmujccixy, jadu'n nej jihuiy ajcxy ycomeenity. ³Iich testigo co je migügtijc miid yci'm tzojcin meen yejccixy, nej jëbi ajcxy ymadaaccixy miid meen, ixti anaxy ajcxy yejccixy. ⁴Ooy xyminuextägyich ajcxy co n'a'ixihuibich ajcxy co jëbi ajcxy meen yajmujccixy huidibi miid pubedaangixy jacjadyi je mibijcpidijc. ⁵Nigi anaxy ajcxy ooy meen yajmujcy ca'ydi jadu'n nej anajty njijp'ixyich. Jayijp ajcxy ñayyejci ma ajt nHuindzin Jesucristo, e huin'it ajcxy ñayyéjigixy ma iich ajcxy jadu'n nej Dios tzocy. ⁶E chi jada' iich ajcxy ooy nminuextacy Tito co huen nicxy jadüg'oc ma miich

ajcxy. Huen nicxy yajcixy yajmay huidibi ti yajtzondägy ma miich ajcxy. Co huen je meen yajmujctäy huidibi cixyot huinijot miid mbubedaangixy je mibijcpidijc ajcxy huidibi yajpatp jim Jerusalén. ⁷Miich ajcxy nigi ooy mmadaaccixy, ca'ydi jacpinjaty ma tüg'ociy Dios ytung. Ooy mij mibijcin miich ajcxy miidity. Ooy myaj'ixpijccixy Dios ytiy'ajt. Ooy mmijottigooygixy mguydunaangixy iich n'ayuc. E nañ jadu'n ooy miich ajcxy xchojccixy xyjihuüygixyich. Nañ ooy ndzocyich co miich ajcxy nigi pubejtin myegipy ma je mibijcpidijc huidibi jim Jerusalén.

⁸Ca' jadu'n n'ane'myich co mbubéjtcixipy je migügtijc huidi jim Jerusalén. Hue' ndzocyich co miich ajcxy mnejhuühuipy jadu'n nej yi jacjadyii mibijcpidijc yhuinma'n bidaaccixyp ci'm co pubedaangixy je ymigügtijc jim Jerusalén. Jadu'n mdunipy ajcxy jigix jëbi nnejhuühuibich pen janch tiy'ajt jadu'n co mdzojccixy mjihuüygixy yi jacjadyii mibijcpidijc. ⁹Com miich ajcxy mnejhuüygixyp jadu'n nej ajt nHuindzin Jesucristo mijmay'ajt mij'oy'ajt tuñ miid iich ajt ycixpi, jadu'n Jesús nipaady nej tüg mijcomeeñybi jiiby tzajpjoty, miid co yi' xchojccim xyjihuüyim mijcajee, chi yi' ixmajtztay yi' y'oy'ajtin jiiby tzajpjoty co ycidacy ya naaxhuñ etz y'ayooy ya. Miich ajcxy ca' anajty ti miidity jiiby tzajpjoty, per jadachambi mbadaangixyp mij'oy'ajtin jiiby tzajpjoty.

¹⁰Miid miich ajcxy m'oy'ajtin ycixpi, ma jada necy nmooybich

miich ajcxy ngapxhuijin jadu'n nej jëbi huaad mdungixy oyjäy'ajtin. Jac'oy co miich ajcxy myajcixipy je huidibi ajcxy myajtzondac jadöjimijt. Miich ajcxy jacjayijp ca'ydi jac ni pinjaty ti myajtzondaaccixy meen yajmugii huidi miid mbubedaangixy je mibijcpidijc huidibi yajpatp jim Jerusalén. Nañ jadu'n miich ajcxy jacjayijp ca'ydi jacpinjaty mijottigooygixy co mbubedaangixy jacjadyii mibijcpidijc. ¹¹Jadachambi tiempo jactungix pubejtin, meen yajmujccix cixyot huinijot jadu'n nej ti myajtzondaaccixy ixti mabaad myajmaygixy je meen yajmugii. Nidüg nidüg yejccix nej ajcxy ii miidity. ¹²Pinjaty y'ofrenda yejcp janch cixyot huinijot Dios ycöbajcip yi' je' y'ofrenda, jadu'n nej ii miidity. Dios ca' yi' pijctzoy huidibi ajt ca' nmiidity.

¹³Ca' nminal'ñich co oy jadu'n co mbubéjtcixip jacjadyii mibijcpidijc ixti mabaad mnayyajhuü'migixy ayo'ndumb. ¹⁴Hue' yajmina'n co quipxyjaty mdzinaaygixy, ni pin cayajconaxipy e ni pin cayajmayjadäpy. Jadachambi tiempo miich ajcxy mmiidity ca'pxy je huidibi mnidzinaáygixip, ixti miich ajcxy conajxpi, paady ycixp jëbi mbubéjtcixipy migügtijc huidibi yajmayjajtp. Jadüg tiempo miich ajcxy myajmayjadäpy, e jacjadyii migügtijc jëbi xypubéjtcixipy, e jadu'n yhuimbidzimipy co mnaybubéjtgixy quipxyjaty miñ xyipy. ¹⁵Com jadu'n jaybety y'ity ma Dios ñecy ma jadu'n ymina'n: "Pinjaty anajty may'amy miid, ca' yajconajxy. E pinjaty anajty hueeni miid, ca' yajmayjajty."

Tito miid ymigügtijc ajcxy

¹⁶Per nyajnajxypich jäygidaacin ma Dios, com Dios ti pidägy ma Tito yjot yhuinma'n co mijottigooy miich ajcxy m'oy'ajtin, tim jadu'n nej iich nmijottigooyich miich ajcxy m'oy'ajtin. ¹⁷Co may'ajt nbijctzooyich ma Tito co nicxipy jadüg'oc ma miich ajcxy, agujc jotcujc cöbicy, com ti anajty jayijp yhuinma'n pidägy ci'm co ñicxa'n jadüg'oc ma miich ajcxy. Jadachambi Tito nicxip ma miich ajcxy miid ci'mdzojcin.

¹⁸Quipxyi miid Tito nguexy iich ajcxy yam tüg nmigüg huidibi ooy chachcapxaadyity majaty mibijcpidijc, co ooy oy ytuñ capxhuäcxi Jesús y'ayuc ytiy'ajt nej huaad jäy ajcxy y'alma nidzoocin paady. ¹⁹Ca' nan jëyi co je mibijcpidijc yi' ycapxpadyyi. Nañ jadu'n ti yhuin'ixyii mibijcpidijc ajcxy co jëbi yhuidity miid iich ajcxy, e tunipy pubejtin miid je may'ajtin oy'ajtin huidibi iich ajcxy ndumyibich miid je migügtijc ycixpi jim Jerusalén. Jadu'n nduunich jaydëbi jäy ajcxy capxpaadip ajt nHuindzin Jesucristo. Etz nañ jadu'n jaydëbi ñiguëxigy co iich ajcxy nbubeda'ñich ajt nmigügtijc cixyjot huinijot. ²⁰Ooy ngüend'atyich je meen huidibi je mibijcpidijc ti yajmujccixy, jigix ca'ydí pin huaad xyñigapxy xyñ'ojyich, jadu'n nej iich ajcxy meen nyajmújccixyich. ²¹Jadu'n iich ajcxy nhuinma'n nbidägy co tudägy ndunáangixyich ca' nan jëyi ma ajt nHuindzin Jesús yhuinduu, nañ jadu'n ma je mayjäy ajcxy yhuinduu.

²²Nañ jadu'n nguejxypich miid yi' ajcxy jadüg ajt nmigüg, je huidibi oy ti ytuuñ ma Dios ytung quipxyi miid iich ajcxy e nejhuiyibich co tudägy ytuñ cixyjot huinijot. E yi' miich ajcxy ooy xyjot'amij'adyii, e oy ytuna'n miid miich ajcxy ma Dios ytung. ²³Pen jim pinjaty nidiy yajtiy je Tito, nimaaygix co iich yi' nmigüg, e yi' miid nduunich ma Dios ytung ma miich ajcxy. E nañ jadu'n pen jim pinjaty nejhuihua'n pinjäy ajcxy yi', yi jacjadyiibi huidibi ajcxy nicxp miid Tito. Nimaaygix co je mibijcpidijc ajcxy ya Macedonia ti quexy ajcxy, ytungixy miid Cristo ymij'ajtin ycixpi. ²⁴Paady ycixp miich ajcxy yi' mdzójccixipy mjihuüygixyipy je migügtijc ajcxy huidibi mimb miid Tito, jigix jëbi je mibijcpidijc ma nidüg nidüg cajp ya Macedonia nejhuihuipy co miich ajcxy yi' mdzojccixy mjihuiygixy je mibijcpidijc tiydudägy. E paady ycixp jëbi iich jotcujc nayjihuüiyijich miid miich ajcxy ycixpi.

Je cüejtin miid je mibijcpidijc ajcxy ycixpi

9 Nañ ca' yjaty ycopicyity co iich miich ajcxy njacnijayíygixipy co je mibijcpidijc huidibi xi' ya pubejtin tunaangixyp ma Dios yjäy huidibi ajcxy jim Judea. ²Com nejhuiyibich co miich ajcxy nañ jadu'n mbubedaangixy cixyjot huinijot Dios yjäy huidibi ajcxy jim Judea. Paady ycixp jotcujc iich jadu'n nnimäyich je mibijcpidijc ya Macedonia jadu'n nej miich ajcxy jim Acaya mhuinma'n pidacy jidöjimijt

co mbubedaangixy je mibijcpidijc huidibi jim Judea. E miid co miich ajcxy jayijp mhuinma'n ti mbidaaccixy co mbubedaangixy je mibijcpidijc huidibi ajcxy jim Judea, paady ycixp may mibijcpidijc ya Macedonia yhuinma'n pidaaccixy co ypubedaangixy nañ jadu'n. ³Paady nguejxypich Tito miid jacjadyii migügtijc ma miich ajcxy, jaydëbi xypubéjtcixipy ma je meen' yajmugii, jadu'n nej ti mbidaaccixy huinma'n. E iich ca' ti tzo'ydu'n nbáadibich miid miich ajcxy ycixpi ma jada pubejtin huidibi ajcxy mguexamyb jim Judea. Com iich ti nnimäyich mayjäy co miich ajcxy ni'ixi' m'ijtcixy miid mbubejtin. ⁴Ca' yjegyity co nijëjity mibijcpidijc huidibi tzinaayb ya Macedonia ñicxa'nip ajcxy miid iich co anajty nnicxyich jim ma miich ajcxy. E co anajty iich ajcxy jim nmejtzcixy, e chi ajcxy nbáatcixipy ca' anajty ajcxy mni'ixijity. Pues chi ooy tzo'ydu'n njihuñhuibich, com ti anajty ooy njot'amij'ájtigixy. Nañ jadu'n miich ajcxy tzo'ydu'n mjihuñhuip. ⁵Paady ycixp huinma'n nbidägyich co oy jadu'n co nijëjity migügtijc nicxy jayijp xycogapxiygixy, e huen xypubejtcixy ma yi meen' yajmugii jadu'n nej jidöjmiijt ti mgapxytungixy. E co anajty nmechich jim ma miich ajcxy, chi ni'ixi' anajty ajcxy miidity yi m'ofrenda, e jëbi jäy ajcxy nejhuñhuip co yi m'ofrenda ti myejccixy cixyjot huinijot, ca'ydi jäy yminaangixy co iich miich adzip ajcxy ti n'ane'mgixy co m'ofrenda nyajmújccixipy.

⁶Jäymetz miich ajcxy jadu'n nej ayuc y'oc'ity: Pinjaty hueni niip, nañ jadu'n hueeni ycosecha

yajpidigy. E pinjaty mij niip, nañ jadu'n mij ycosecha yajpidigy.

⁷Nidüg nidüg mibijcpi yegipy y'ofrenda jadu'n nej anajty ci'm yhuinma'n ti pidägy co yega'n. E ca' yegipy ametz jotmetz. E nañ jadu'n ni yca'adzip yca'a'écity. Com Dios chojcpy yjihuiyb pinjaty cixyjot huinijot y'ofrenda yejcp.

⁸Dios jëbi may'ajt oy'ajt tunipy miid miich ajcxy mijcajee, e miich ajcxy mbáatcixipy tüg'óciy tijaty conuucxin, e ixti mmiid'adipy tüg'óciy huidibi myajmayjajtcixy, e nañ jadu'n conaxpi naadigibi nej huaad jacjadyii mibijcpidijc mbubejtcixy, e mdúngixipy canaagnax oyjäy'ajtin. ⁹Jadu'n jaybety ymiñ ma Dios ñecy, ma jadu'n ymina'n:

Yi oyjäydic ajcxy, yi' ajcxy nimooyb ayooobitijc huidibi ajcxy yajmayjajtpy. Yi oyjäydic ajcxy co oyjäy'ajtin tungixy, yejccixyp iixpejt oybi huidibi y'idipy huinixii.

¹⁰Dios yejcpy je tiim huidibi jäy ajcxy ñiipy, nañ jadu'n Dios yejcpy je jicxy picy huidibi nidzinaayim nijugy'ajtim. E jadu'n co miich ajcxy oyjäy'ajtin mdungix mijcajee, je m'oyjäy'ajtin ajcxy ñipaadip nej jihuñ mgosecha myajpidiccixy may'amy. ¹¹E jadu'n miich ajcxy miid'adipy tüg'óciy jugy'ajtin comeen'ajtin, jaydëbi m'ofrenda myejccixy mij'amy. E mayjäy ajcxy Dioscojuyip yajnaxipy ma Dios miid je m'ofrenda ycixpi, co anajty nyecyich miich ajcxy m'ofrenda ma yi' ajcxy huidibi yajmayjajtp. ¹²Co iich ajt pubejtin nyejcim ma jacjadyii migügtijc,

canan jëyi co nbubejtim miid tijaty yajmayajtcixyp. Nañ jadu'n yi' ajcxy jëbi yajnajxcixy Dioscojuyip canaag'oc. ¹³Yi' ajcxy capxpadamb Dios miid co je m'ofrenda huidibi ajcxy ti myejccixy, yi' je' tiy'ajtip co miich ajcxy mgapxymidoogixy Cristo y'ayuc ytiy'ajt. Paady ycixp may mibijcpidijc ajcxy Dios ojadátcixipy e nañ jadu'n Dios iibáatcixipy capxpáatcixipy miid je pubejtin huidibi miich ajcxy anajty myejcyp miid yi' ajcxy ycixpi, etz nañ jadu'n miid jacjadyii mibijcpidijc ycixpi. ¹⁴E ci'm yi' ajcxy Dios ojadadipy mibijctzohuipy miid miich ajcxy ycixpi, etz xychóccixip xyjihuíygixip ooy miid co Dios je mijpi conuucxin ti yecy ma miich ajcxy. ¹⁵Dioscojuyip yi Huindzin'ajtim Dios miid yi ymijconuucxin huidibi ti yecy ma iich ajtin, ni pin canejuíy nej jëbi yajnajtzcaxiy.

**Pablo miidity cõtujcin
co y'apóstol'adyii**

10 Hich Pablo nmigapxypich miich ajcxy miid yungnaxy njot nhuinma'n, jadu'n nej jihuíy Cristo miich ajcxy xymiidmiydaaccixy. Com Cristo yungnaxy jot huinma'n miidity. Nijëjity miich ajcxy yminaangix co ooy yungnaxy naybidägyiijich co n'ityich miid miich ajcxy, e jadachambi co jigüëgy nyajpaadyich, hue' n'ahuimbityich ahua'n, ndunaamybich ti ndunaamybich. ²May'ajt nbijctzooybich co anajty iich miich ajcxy nicxy n'ijxcixy, ca' jadu'n ndzocyich

co copicy n'ahua'ndägibich miid nijëjity miich ajcxy huidibi xyñihuambejtpich, co nduñich etz ngapxyich ngi'mtzojcin tim jadu'n nej huenpin naaxhuiñjáy ytungixy etz ycapxcixy miid yci'mtzojcin. Janch ni'ixi' n'ityich, co anajty jim nmechich, chi miid nnayhuindinähuiybich yi' ajcxy huidibi jadu'n xyñihuambejtpich. ³Janch tiy'ajt co ndzinaayich jadu'n nej naaxhuiñjáy chinaaygixy. Per ca' ndziptuñich nej jáy ajcxy chiptungixy. ⁴Ca' iich ajt nyajtunim naaxhuiñjáy ymic'ajt co nnaygohuaanim ma je jibicpi huidibi xymidzip'ajtim. Hue' nyajtunim Dios ymic'ajt, huidibi jëbi miid nmimadaacim tüg'óciy huidibi ca'oybi miid. ⁵Jadu'n iich ajcxy ca' nyajtzobadaangixyich je ayuc tiy'ajt huidibi ca' yjanchity, etz je' ayuc pin amij agix naybidaacip co Dios y'ayuc ytiy'ajt adujci. Tüg'óciy naaxhuiñjáy y'ayuc ytiy'ajt nbidáaccixyich ma Cristo, jigix tüg'óciy jáy ajcxy capxymidohuip Cristo. ⁶Co anajty miich ajcxy mhuinma'nybidaaccixy co huädz mgapxymidohuaangixy tüg'óciy Cristo y'ayuc ytiy'ajt, pinjaty cacapxymidoy, hue' ni'ixi' n'ijtcixich co yajmöhua'n castigo pinjaty cacapxymidoo.

⁷Miich ajcxy yi' mdzachcuenditungixy jáy ajcxy nej yjáy'ajtcixy. Pen jim pinjaty ñayjihuíyii janch agujc jotcujc co Cristo yhuin'ixyii miid ytung ycixpi, huen huinjhiuyigixy jotjoty co Cristo ti xyhuin'ijxcixyich nañ jadu'n miid yi' ytung ycixpi. ⁸Hich ca' ti tzo'ydu'n jihuíyich

miid co ci'm nnaaygömayiijich hueeni miid co Jesucristo xymooygixyich ane'min cötujcin. Com iich ajt nHuindzin Jesucristo ti xymóoygixyich jada cötujcin, jigix iich miich ajcxy nyajyeecip mmibijcin, canan nyajtigoyip ajcxy mmibijcin. ⁹Ca' jadu'n ndzocyich co yquëxigipy jadu'n nej jihuüy n'adzigihuaangixy miid je necy huidibi nyajniguejxypich miich ajcxy. ¹⁰Yminaangixy co iich nnecy ooy tzaachyaty chach chaach. E yminaangixy co ma jäy ajcxy yhuinduu yung naxy njäy'aty, e ngapxin nmiydáacinich ca' pin jäygidägy. ¹¹Per yi jäy ajcxy huidibi jadu'n minaangixp, copicy ajcxy nejhuühuipy co jadu'n nej iich ngapxin necyjoty co nijayiygixy, co nyajpaadyich jiguem, nañ tim jadu'n ngapxa'ñich co anajty n'ityich ma miich ajcxy.

¹²Ca' huaad n'ocnay'ijxquipxim o nyajtügiyim miid yi' ajcxy ytung huidibi tzach naygömayaanip ci'm. Tzuu huinma'ñ locihuinma'ñ ajcxy ytungixyp, co pin jadu'n nay'ixquipxip naymidoguiplxip miid yci'm'ayuc yci'mhuinma'ñ huidi ii yjajtpy ñejhuüyb. ¹³Ca' iich ci'm naygömayiib ma ycapadyii, huidibi iich ajcxy ca' xypátciyxich. Dios iich ajcxy xyajnejhuüybich nije' nije' it lugar ma yi' tzocy ndúngxibich. E Dios jadu'n tzojc co nicxy ndungixy jim Corinto ma miich ajcxy myajpatcixy. ¹⁴Paady ycixpi ndúngxiyich jëyi ma Dios xyquexyich, ca' jac ma. Nej ixypy y'octunyii y'ocjadyii, pen ca' ixypy iich jayijp ti n'ityich ma miich ajcxy. Pues iich tim

jayijp ngapxhuäcx Dios y'ayuc ma miich ajcxy, e ca' jac ni pin. ¹⁵Pen huingbi jäy je Dios ytung yajtzondaacip ma tüg cajp, pues ca' iich huaad jim nduuñich, jadu'n nej jihuüy iich ti nyajtzondägyich je tung. Ca' jadu'n nduuñich, hue' njijp'ijxypich co miich ajcxy myajyeegip mmibijcin, huin'it jëbi njactunipich ma miich ajcxy, jadu'n nej Dios tzocy co ndunipyich. ¹⁶Co anajty jadu'n ti njactuñich ma miich ajcxy, huin'it xii ya n'ihuäcxa'ñich ngapxhuäcxa'ñich Cristo y'ayuc ytiy'ajt ma je it lugar jactim jiguemjatypi ma miich ajcxy. Per ca' nduna'ñich ma huingbi ti yajtzondägy je tung.

¹⁷Ooy ycopicyity ngömayim nyajmij'ajtim ajt nHuindzin Jesucristo, e ca' y'oyity co naygömayim ci'm. ¹⁸Com Dios ca' jäygidägy pinjaty ci'm naygömayip. Hue' Dios yjäygidacypi pinjaty ajt nHuindzin Jesucristo capxpatp.

**Pablo etz je' ajcxy huidibi
y'ayuccapxhuäcxp miid anii**

11 Huaad co miich ajcxy ixypy xy'ocmimecxtujcich hueeni iich nloci huinma'ñ huidibi ngapxaamybich. Oy ixypy ñejity mimecxtuccich. ²Ooy ndzocy ooy njihuüyich miich ajcxy. Dios ti xymöyich je tzojcjin jihuüyjin huidibi nmiidich miid miich ajcxy ycixpi. Ndzojcypich co cixyjot huinijot miich ajcxy mmijpidaaccixy Cristo. Co miich ajcxy yajmij'adip Cristo cixyjot huinijot, huin'it jadu'n miich ajcxy nipaadipy nej tüg töxy'anäg pi'cnip huidibi pijcp miid tüg

yëydijc. ³Ndzigiibich co huingbi jäy xyajhuinma'ñyidigoyaangixy miid ixpicytijc y'ayuc huidibi ca' ytiy'ajtity. E miich ajcxy m'ixmadzaangixy jadu'n nej cixyjot huinijot ti mmijpidaaccixy Cristo. Tim jadu'n nipada'n miich ajcxy mjadaangixy nej yjajty jecy'ajty je Eva co tza'n yhuin'iini. ⁴Com miich ajcxy mgöbijccixy huingbi jäy huidibi tigachjaty yaj'ixpijcp Jesús ytiy'ajt, ca' yjadu'nity nej iich ajcxy nyaj'ixpicyich. Etz nañ jadu'n miich ajcxy jotcujc mgöbijccixy huingbi espíritu, ca' yjëjity je Espíritu Santo huidibi ti mgöbijccixy jayijp'aty. Etz nañ jadu'n mgöbijccixy tigachjaty ayuc tiy'ajt, e ca' y'ocjëjñ huidibi ajcxy m'alma xyajñidzoocip. Ca' y'ocjëjñ huidibi ti mmidoogixy ma iich ajcxy. Mic'amy mdzachmijpidaaccixy huingjäy y'ayuc. ⁵Ca' jadu'n ytiy'ajtity co yi huindzindijc ajcxy huidibi naydijigixp Jesús y'apóstol huidi jim ma miich ajcxy, co jac mic'ajt miid ajcxy etz yjacmiid ajcxy ixpijcin ma Dios ytiy'ajt, ca'ydi iich. ⁶Oy iich jada' ca' njatyich nej yajxon ngápxibich, ca' ooy ngo'ayúcgich. Per ca' ñejity com yajxon njatyich nnejhuiyich Dios ytiy'ajt. E ti nyaj'ijxcixy nyajnejhuiygixy co n'ixpíycigich ma Dios ytiy'ajt miid je ayuc huidibi ngapxhuäcxich ma miich ajcxy etz je mijhuinma'n huidi nduunich co jim n'ijtyich ma miich ajcxy.

⁷¿Nej tundigoyich jada' co ngapxhuäcxich Jesucristo y'ayuc ma miich ajcxy e ca' nbijctzooyich meen miid ndungich

ycixpi? Jadu'n nnayyajnaxchic anajty nej tüg midumbi jigix miich ajcxy jac'oy jacjotcujc mdzinähuip. ⁸Ti ngöbicyich meen huidibi jacjadyii mibijcpidijc ti xymöyich huidibi tzinaayb ma huingbi cajp. Yi' ajcxy ymeen nyajtuunich co nyaj'ixpijcyich miich ajcxy. ⁹Co n'ijtyich miid miich ajcxy jadöjimijt jadöhuix'am ca' nbijctzooyich ma miich ajcxy huidibi nyajmayajtpyich anajty. Ca' n'adzijpyich ni pin. Yi migügtijc huidibi ajcxy tzoön Macedonia, yi' ajcxy xymooyich huidibi anajty nyajmayajtpich, paady ycixp ca' anajty meen nbijctzooyich ma miich ajcxy, ca' n'adzijpich miich ajcxy. E jadu'n njactuna'ñich jadu'n nej nduunich miid miich ajcxy co n'ijtyich jim jadöjimijt. ¹⁰Nejhuiyich co yjanchity co nmídidyich Cristo ytiy'ajt, nañ tim jadu'n nnejhuiyich co ci'm nbaadyich huidibi miidnay'ixyijich. E ca' pin ma tüg'óciy je Acaya naaxjot xycapjicibich jada jotcujc'ajtin. ¹¹¿Na'amy co jadu'n nmína'ñich? ¿Je' co iich miich ajcxy ca' ndzojccixy? Ca' yjadu'nity. Dios ñejhuiyb co ndzocy njihuiyich miich ajcxy.

¹²Per njacyajtüyöyaamybich je ndungich huidibi ndumyich, e ca' meen nbijctzohua'ñich miid iich ndung ycixpi jigix co yi jacjadyii huindzindijc huidibi yaj'ixpijccixp ma miich ajcxy, ca' jëbi y'iindaaccixy co yi' ajcxy tú'ciy ytungixy jadu'n nej iich nduunich. ¹³Yi' ajcxy ymínaangixy co Cristo ti yajniñbjcigixy co ajcxy yi' y'apóstol'adyii, e ca' yjanchity,

nigoob ajcxy huin'ingixy yi mibijcpidijc. Ñayyajnáxigixy ci'm nej jihuüy Cristo y'apóstol'ájtigixy, e ca' yjanchity. ¹⁴Nañ ni ca' oy nhuinmaayich co jadu'n idiitzcixy, com nañ jadu'n je Satanás ñayyajtigachyüi ñayyajnaxyüi nej Dios y'ángel huidibi tiy'ajt miid, e ca' yjanchity. ¹⁵Paady ycixp nmibijcpich co yi jäy ajcxy huidibi tumb miid je mujcu' nañ jadu'n nayyajnaxyüi jadu'n nej jäy tudägyüi, e ca' yjanchity. Per Dios chaachytunamyb ajcxy jadu'n nej ypanyüi miid je jibicpi ycixpi huidibi ajcxy ytumyüb.

Je tzaachyüi je ayo'n huidibi Pablo yjajtyp co y'ayuccapxhuäcxy

¹⁶Jadüg'oc iich miich ajcxy nnimaaygixy: Ni pin ycamina'nipy co iich locijity. Per pen nijëjity jadu'n yminaangixy, ca' ñejity. Miich ajcxy amidoo'ijtcix iich n'ayuc, jigix jëbi naygömayijich ci'm. ¹⁷Ca' iich ajt nHuindzin Jesucristo xycötujcmöyich, co jadu'n jëbi ngapxyich jadu'n nej cham ngapxa'ñich. Hue' ngapxa'ñich jadu'n nej tüg loci jäy co naygömaya'ñyijich ci'm. ¹⁸Mayjäy ajcxy ooy ci'm chachnaygömayáanigixyp miid huidibi ti tungixy miid yci'm mic'ajt ya naaxhuñ. Nañ jadu'n iich nnaygömaya'ñyijich ci'm. ¹⁹Miich ajcxy mdzachcöbajccixyp loci jäy ajcxy y'ayuc, je' co mdzachnayyajnaxáanigixy jadu'n nej jihuüy ajcxy ooy mdzachcohuinma'ñity. ²⁰Mgöbijcypy miich ajcxy co jäy ajcxy xytumbi'adiiyb nej tim

tzojccixy, huidibi ajcxy xyhuinjicxp xyhuimbijcp xyhuimmeetzp, e huidibi ajcxy xy'ane'mgixp, xycamij'ijxcixy xycamijpidaaccixy, ixti mgöbijccixyp co xycojxcixy ma ajcxy mhuiñyijp. ²¹Oy njatzo'ydu'njihuüyich co nmina'ñich co ca' jadu'n nmídidyich je jotmic'ajtin, jigix jëbi iich miich ajcxy nduüñich jibic, jadu'n nej yi jadu'mbi huindzindijc ti xytungixy.

Per jadu'n nej yi' ajcxy ñaygapxpadyüi ci'm, nañ jadu'n naygapxpada'ñyijich ci'm. Ca' ñejity pen capxpich jadu'n nej tüg loci jäy. ²²Pen hebreojäy yi' ajcxy, hebreojäy iich nañ jadu'n. ¿Conaax cogajp ajcxy Israel? Iich nañ jadu'n. ¿Abraham ajcxy ymij'ap'ajtpy ymijteedy'ajtpy? Iich nañ jadu'n. ²³¿Nej tumb ajcxy miid Cristo? Nigi nduñyich miid Cristo, ca'ydi yi' ajcxy. Ca' ñejity oy ngapxyich jadu'n nej tüg loci jäy. Jac mic ti nduüñich miid Cristo ca'ydi yi' ajcxy. Canaag'oc codungdijc xychaachytuüñich. Ti nyajci'atyich miid matz etz miid coochac janch canaag ci' janch ycamacho'nity. Canaag'oc codungdijc xypidaacyich pujxtigoty, e yi' ajcxy ca'. Canaag'oc o'cin jijp'am ti nyajpaadyich, e yi' ajcxy ca'. ²⁴Migoox'oc judíojäy ajcxy ytungmiidpi xyci'ajtyich miid cochac iipx majmocx midaax ci'. ²⁵Tugiig'oc xychaachytuüñich miid matz. Tügtecy ajcxy xychaagächich. Tugiig'oc je barco yquñ mejy'agujc je huidibi iich anajty nyajnicxiyb. Co je barco yquñ tügtecy, chi tüg tzuüm etz tüg xii n'ijtyich ma je mejy anajty ooy ypidigy. ²⁶Ooy viaje nduüñich canaag'oc, e

o'cjijp'am n'ijtyich ma mijniigom yjadyii, e nañ jadu'n ooy anajty may meetzpi yajpaady ma anajty nhuidityich. Nmigogajpich, yi judfojáy, xyjayaj'ogaanich ajcxy. Ti ayo'n nbaadyich ciudadjoty etz ma yuugjot etz mejyoty. E nañ ti ayo'n nbaadyich miid jáy ajcxy huidibi naybidaacip ajcxy nej iich ajt nmigüg, e ca' anajty yjanchity. ²⁷Minaajity ooy mic njihuüyich ndung n'ayo'nich. Canaag'oc ti ndzumnaxyich ca' nmäyich. Canaag'oc nxiinaxyich miid yuu tidzibi. Janam jatzojc n'ayu'atyich. Minaajity ooy njihuüyich je tiichypi, etz nyajmayjatyich nhuit nducxyich.

²⁸Miid jada ycixpi etz miid jac-huidijaty, nañ jadu'n jabom jabom ooy mic njihuüyich jadu'n nej yajpaady je mibijcpidijc nidüg'óciy canaag picy xi ya. ²⁹Pen nijējity mibijcpidijc yajpaady amutz ma ajcxy ymibijcin, nañ jadu'n iich nayjihuiüijich amutz. Pen nijējity mibijcpidijc ypocytungixy, iich ndzo'ydu'n njihuüyibich etz jibic nayjihuiüijich miid yi' ajcxy ypocy ycixpi. ³⁰Pen naygömayaanibich ci'm, naygömayaanibich co amutz njihuüyijich. ³¹Je Dios iich ajt nHuindzin Jesucristo yTeedy, je huidibi huaad n'ojadajtim n'iibaatim ngapxpaatim huinixii huinitempo, yi' ñejhuiüyb co tiy'ajt jadu'n nej ngapxyich.

³²Jecy'ajty co n'ijtyich jim Damasco, je gobernador huidibi anajty tumb miid je rey huidibi yxii Aretas, ypidac soldados ajcxy ma jadyii mijtu' ycajptigiy, jigix jēbi xyajnicxyich mach. ³³Per je mibijcpidijc ajcxy xycodiyñajxich

naaxcxy mijcachjoty ma tüg ventana aguu ma je mijpoch huidibi je cajp miid yjübojtz'ahuidityity. E jadu'n ndzoocyich ma je gobernador yc'i'am.

Huidibi Pablo yhuin'ijx etz nejhuiüy

12 Ni ti ycayajpaady ycayajganar'aty co ci'm ndzachnaygömaayim ndzachnayñigapxim ndzachnayñimiyydaacim. Per ca' y'ocnejity nimiyydägaamybich ti nhuin'ijxypich cumäyjoty, je huidibi je Huindzin Jesucristo xyajhuin'ijxpich xyajni'ixiiybich. ²N'ixy'ajtypich tüg yēydijc huidibi mibijcp Cristo. Cham majmactz jimijt ma Dios yajpättigiyi tzajpjoty ma je midugiigpi tzajp. E ca' nejhuiüyich pen hue' yajpättigiiyi miid ñinixc o pen ca'. Dios tügpajc nejhuiüyb. ³⁻⁴Jadüg'oc nmina'ñich co Dios ti yajpättigiy je yēydijc ma je oybi it. E ca' nnejhuiüyich pen janch ti ypättigiy miid ñinixc o pen ca'. Dios tügpajc nejhuiüyb. E jiiby ma je oybi it midoy capxy ayuc huidibi ca' huaad ni pin jáy capxy miydägy nimina. ⁵Ooy iich amij agix nayjihuiühua'ñyijich miid je jadu'mbi yēydijc jadu'n nej jējin huidibi Dios yajpättigiy tzajpjoty. Per ca' iich ci'm nayñimiyydäga'ñyijich naygömaya'ñyijich. Hue' janchtiy nayñimiyydägaanibich ci'm nej nduñ n'ayooyich ma iich ndzinaayin. ⁶Oy ixypy iich ci'm njanayñimiyydäga'ñyijich janch oy nej nduñ n'ayooyich, ca'p je' anajty ngapxtigooyich, com je' anajty ngapxpich je janchypi. Per

ca' jadu'n naygömaya'ñiyiijich, com ca' ndzocyich co jäy ajcxy nicxy xycömaayich nīgi anaxy. Huaad jadu'n co ajcxy miid miydacy je migügtijc huidibi ajcxy ijxcixp huidibi ndumyibich o huidibi ayuc ajcxy ymidoogixp huidibi ngapxpich.

⁷Je capxy ayuc huidibi Dios xyajnejhuiyich jiiby tzajpjoty, ooy anajty chach y'oyity. Paady ycixpi Dios pidacy jadu'n nej jihuüy tüg apy ma iich nninix, jigix ca'ydi amij agix nayjihuiyijich. E je apy jadu'n nipaady nej mujcu' xyajtzaachiyich. ⁸Tugiig'oc Dios ti nmibijctzooyich co huen xyajpidzimich je huidibi xyajtzaachiyibich. ⁹Per je Huindzin Jesús xyñimaayich: "Jëbi jadu'n co may'ajt ndunipich miid miich ycixpi. Co pinjaty pumäy ñayjihuiyii, huin'it nīgi ñiguëxigy iich nmic'ajt." Paady ycixpi njotcugiyich co pumäy nayjihuiyijich, jigix ñiguëxigipy Cristo ymic'ajt ma iich ndzinaayin. ¹⁰Paady ycixpi ooy njotcújcidyich co pumäy nayjihuiyijich, co jäy xyñigapxy xyñi'ojyich, co ti nyajmayjatyich, co jäy xy'ixhuidityich xypahuidityich, co tzaachypi nyajnaxyich miid Cristo ycixpi. Co nayjihuiyijich pumäy, chi nīgi mic nayjihuiyijich miid Cristo ymic'ajt ycixpi.

**Pablo ca' yjotcuje'aty nej
je mibijcpidijc ajcxy jim
Corinto ytungixy**

¹¹Co iich jadu'n ci'm naygapxpadyijich, tim jadu'n nipaady nej jihuüy iich tüg loci jäy.

Adzip miich ajcxy jadu'n xytuuñich co copicy naygapxpadyijich ci'm. Hue' yjapaadyii miich ixipy ajcxy xycömaayibich xycapxpatpich. Iich ca'p iich ti ndzoohuity. Oy ixipy iich ca' ti mic'ajt nmiididyich, per jatytimy nīgi mic'ajt nmiididyich, ca'ydi yi huindzindijc huidibi ma miich ajcxy, huidibi ajcxy naydijip apóstol, e ca' yjanchity. ¹²Ma je tung huidibi nduuñich miid mecxtujcin ma miich ajcxy, ti ooy ñiguëxigy miid canaag iixpejt, mijhuinma'n etz milagros, co iich janch Cristo xy'apóstol'adyijich. ¹³Ca' jadu'n ytiy'ajtity co mminaangixy co nīgi oy ti nduuñich ma yi jacjadyii mibijcpidijc ma jacjadyii cajn, ca'ydi jadu'n nej ti nduuñich ma miich ajcxy. Pen ti ndundigooyich co ca' ti nbijctzooyich meen miid iich ndung ycixpi ma miich ajcxy, jadu'n nej jacjadyii ajcxy ytungixy, pues tungix may'ajt meecxich ajcxy.

¹⁴Jadachambi ni'ixi' n'ityich co nnicxa'nich midugiig'ocpi jim ma miich ajcxy. Ca' ti pubejtin nbijctzohua'nich ma miich ajcxy miid ndungich ycixpi. Ca' ndzocyich miich ajcxy mmeen. Hue' ndzocyich co miich ajcxy xymijnicxpedipyich. Jac'oy co iich miich ajcxy nbubedipy, ca'ydi co miich ajcxy xypubedipyich. Jadu'n iich nipaady miid miich ajcxy nej tüg ungdeedy. Je ungdeedy ypubejtpy y'ung, e ca' nan je ung pubejtyp yteedy. ¹⁵Iich jotcuje nyajtundähuibich ma miich ajcxy tüg'óciy tijaty nmiidich, ixti ngi'mmic'ajtich tüg'óciy

nyajtunaamybich miid miich ajcxy ycixpi, jigix jēbi nbubedipyich miich ajcxy. Oy janiguēxigy co iich miich ajcxy njadzojccixy njajihuiyigixy, e miich ajcxy ca' xychójjccixyich xyjihuiyigixyich.

¹⁶Nijējity miich ajcxy mminaangixy co janch tiy'ajt co ca' ti pubejtin ti nbijctzooyich ma miich ajcxy, nijējity yminaangixy co janch nihuinma'n ti nyajcāgixyich ma tūg trampi miid anii. ¹⁷¿Nej ti iich miich ajcxy nhuin'iingix miid je migūgtijc huidibi ajcxy nyajniguejx?

¹⁸Nbijctzoohuich may'ajt ma Tito co huen nicxy xycogapxiigixy jadūg'oc. E nyajpuguexiigixy jadūg'ajt nmigūg huidibi miid nīcxy quipxyi. ¿Nej ti miich ajcxy Tito xyhuin'iingixy? ¿Nej ca' yjanchity co iich etz Tito quipxyjaty iich ajcxy nhuinma'n nmiidity, e tú'ciy ndūngixyich?

¹⁹Ca' yjegyity co miich ajcxy mhuinma'ñybidáaccixy co iich ajcxy ndzachnayñigapxtútutigixy ma miich ajcxy. Ca' yjadu'nity. Ngāpxcixpich nmiydáaccixpich ma Dios yhuinduu je ayuc tiy'ajt huidibi Cristo xymóoygixich. E tūg'óciy huidibi ndūngixpich, hue' ndūngixich jigix yeegip miich ajcxy mmibijcin. ²⁰Com tzigiibich co anajty nicxy n'ijxcixyich miich ajcxy, ca' jegyity co nbadaamybich je tiy'ajt co miich ajcxy ca' mhuinma'ñymiidity jadun nej jēbi njāygidāgyich yi mhuinma'n ajcxy. E miich ajcxy nañ jadu'n ca' mjāygidāccixipy nej iich nhuinma'n miidityich. Tzigiibich co miich jada'

ajcxy mnaychiptúnigixy, ca' mnay'ixáanigixy nidūg nidūg, mnaymijotmá'tigixy; mnayñi'ojfiyigixy, e mbiiltzcapxcixy; co ooy amij agix mnayjihuíyigixy, e ca' mnay'ayuc-huinjihuíyigixy, ca' oy m'ijtcixy. ²¹Tzigiibich co jadūg'oc nicxy n'ixyich miich ajcxy, chi ajt nDios xyajjihuíhuibich tzo'ydu'n miid miich ajcxy ycixpi, etz njihuíhuibich tajin mayin miid miich ajcxy mbocy ycixpi, e com ca'ni mjothuimbijtcixy mjāydigooygixy je mjibic-huinma'n jadu'n nej mmigapxtigooygixy e mmiidundigooygixy huingbi tōxyjāydijc, etz jadu'n nej mmiidundigooygixy migūg ytōxyijc, etz jadu'n nej jibic-huinma'n miich ajcxy mmiidity.

**Ane'min capxhuijin etz capxpooocxin
huidibi cijxnip je necy**

13 Jada je' ymidugiig'oc co iich miich ajcxy nicxy ngo'ixihuaangixyp. Pen miich ajcxy mxihuaangixyp tūg migūg ma iich co ti ytundigooy miid Dios ytiy'ajt, hue' tzocy miid metz o tugiig testigos. ²Co je mimejtz'ocpi iich miich ajcxy oy ngo'ixiy, chi nnimaayich yi' ajcxy huidibi ti ytundigooygixy anajty, e nañ jadu'n nnimaayich je huidibi jacpocytungixp co iich anajty jadūg'oc nicxy miich ajcxy n'ijxcixy, ca' nyajtuna'ñich mecxtujcin ma yi huidibi ajcxy pocytungixp. E cham co nyajpaadyich jigūēgy ma miich ajcxy, nnigapxpejtpyich ma jada necy co jadūg'oc nicxy n'ixa'ñich miich ajcxy, ca' nmimecxtuga'ñich yi' ajcxy huidibi pocytungixp. ³E

jadu'n miich ajcxy mmiid'adipy tiy'ajt co ngapxnajxich Cristo y'layuc. E Cristo ca' je' yjadu'nity nej tüg jäy huidibi ca' mic'ajt mmiidity. Hue' je' yajnuëxigyp ymic'ajt ma miich ajcxy. ⁴Janch tiy'ajt co jadu'n ajcxy yajcruudzpejty Jesucristo nej jihuüy ca' anajty mic'ajt mmiidity. Per jadachambi Jesucristo jugy'ajtp mmiid Dios ymic'ajt. Nañ tim jadu'n co n'ijtim mmiid Jesús, jadu'n yquëxigy nej jihuüy ca' mic'ajt mmiid'ajtim. Per co n'ida'ñich mmiid miich ajcxy, nmiid'adaanibich Dios ymic'ajt mmiid co nyajpaadyich ma Cristo.

⁵Ci'm naydiy'ajtpjicigix nidüg nidüg, pen janch tiydudägy mmibijccixy Cristo. Ci'm huinmaaygix ma ajcxy mgi'mdzinaayin, pen janch mmibijccixy. ¿Nej ca' mdimjihui'mybijccixy, pen mmiid ajcxy Cristo ma mjot mhuinma'ñ? Pen ca' yjadu'nity hue' anajty Cristo mmibijccixy nigixy cohuajc.

⁶Per njijp'ijxypich co miich ajcxy mnejhuihuipy co yjanchity co Cristo ti xyajñibicyich yi' ytung, e ca' n'indägyich. ⁷Dios nmibijctzooybich mmiid miich ajcxy ycixpi, jigix ca' ti jibic-huinma'ñ mdúngixipy. Canan co iich ajcxy ndzachcömaybidzimmáangixyich, o co iich ajcxy nigí mmiidity Dios ytiy'ajt ca'ydí jac ni pinjaty. Jadu'n ndúngixyich, jigix miich ajcxy mdunipy oybi. Ca' ñejity oy jadu'n yquëxigipy nej jihuüy iich ajcxy ca' oy mij n'ixpícyigich. ⁸Com ca' huaad ni ti nej ndunim huidibi ca' yjanchity huidibi ca' ytiy'ajtity. Hue' tzocy co tüg'óciy huidibi

ndunim, naybadiib mmiid Dios ytiy'ajt. ⁹Paady jotcuje iich ajcxy co nyajpáatcixyich nej jihuüy ca' iich ajcxy mic'ajt mmiidity, jigix miich ajcxy mic'ajt mmiid'adipy ma mmibijcin. Nmibijctzoohuaamybich ajcxy Dios mmiid miich ajcxy ycixpi, jigix ajcxy mmibijcin mi'íjtcixipy ca'pxy. ¹⁰Jada necy iich jayijp nguexamyb ma miich ajcxy, ma yam ca'ni nicxy n'íjxcixyich miich ajcxy jadüg'oc, jigix ca'ydí adzip ahua'n anajty nyajtuuñ iich n'ane'min ma miich ajcxy. Iich ajt nHuindzin Jesucristo ti xymöyich mic'ajt, jigix jëbi iich miich ajcxy nyajyeegipy ma mmibijcin. Ca' nyajtigoyaanich miich ajcxy yi mmibijcin.

¹¹Migügtijc ajcxy, capxcijxpich mmiid miich ajcxy, huen Dios xypubéjtcixipy xypudigíyigixyipy. Mijottigooygix cuydunaangix tüg'óciy Dios ytiy'ajt ma mdzinaayin. Jotcuje'ajtcix. Chinaaygix mmiid tú'ciy mjot mhuinma'ñ. Naymiid'íjtigixy agujc jotcuje. Huen ajcxy Dios xymiid'ijtcixy. Je Dios huidibi jotcuje'ajtin yejcp, e nañ jadu'n Dios xychojtáaygixipy xyjihuiydaaygixipy.

¹²Naygapxpóocxigix xic xon.

¹³Tüg'óciy Dios yjäy huidibi ya, yquejxyp ajcxy capxpóocxin ma miich ajcxy.

¹⁴Huen ajt nHuindzin Jesucristo may'ajt oy'ajt tunipy mmiid miich ajcxy ycixpi. Huen Dios xychojccixy xyjihuiyigixy. Huen Dios yjihui'ñ ymic'ajt ity ma nidüg'óciy miich ajcxy mjot mhuinma'ñ. Jadu'n ngapxycíxyich. Amén.